

दिनांक 22.07.2025

समय: 18.45 बजे

- राष्ट्रपति द्रौपदी मुर्मू उपराष्ट्रपति जगदीप धनखड़ रो इस्तीफो मंजूर कीनी।
- केन्द्र सरकार सुप्रीम कोर्ट कॉलेजियम री सिफारिश परां राजस्थान हाईकोर्ट सारु सात नुवा न्यायाधीशां री नियुक्ति रो हुकम दीनी।
- प्रधानमंत्री नरेन्द्र मोदी काल ब्रिटेन अर मालदीव रा दौरा सारु रवाना व्हेला।
- मुख्यमंत्री भजनलाल शर्मा जनता ऊं चौमासा मांय बत्ता ऊं बत्ता पौधा रोपण री अरज कीनी।

000

राष्ट्रपति द्रौपदी मुर्मू उपराष्ट्रपति जगदीप धनखड़ रो इस्तीफो मंजूर कर लीनी है। राज्यसभा मांय प्रश्नकाल पाछे पीठासीन अधिकारी घनश्याम तिवाड़ी उपराष्ट्रपति जगदीप धनखड़ रा इस्तीफा ऊं जुड़ी गृह मंत्रालय री अधिसूचना रा बारा मांय जाणकारी दीनी। ई पाछे राज्यसभा रा उपसभापति हरिवंश राष्ट्रपति मुर्मू सागे मुलाकात कीनी। प्रधानमंत्री नरेन्द्र मोदी श्री धनखड़ रा बेहतर स्वास्थ्य री कामना कीनी है। सोशल मीडिया पोस्ट रे जरिए श्री मोदी ने कहे के श्री धनखड़ ने उपराष्ट्रपति समेत कई भूमिकावां मांय देश री सेवा करण रो मौको मिल्यो। ध्यानजोग है के श्री धनखड़ स्वास्थ्य ऊं जुड़्यां कारणां रो हवालो देता थकां काल इस्तीफो दे दीनी हो।

000

केंद्र सरकार सुप्रीम कोर्ट कॉलेजियम री सिफारिश मंजूर करता थकां राजस्थान हाईकोर्ट मांय सात नुवा जज नियुक्त करण रा हुकम जारी कीनी है। ई पाछे राजस्थान हाईकोर्ट मांय न्यायाधीशां री तादाद पहली दफा 40 ने पार कर गयी है। नुवा बनायी ज्या सात न्यायाधीशां मांय ऊं छह वकील कोटा ऊं है जद के एक न्यायिक सेवा रा अहलकार है। अधिसूचना रे मुजब आला वकील संदीप तनेजा ने राजस्थान हाईकोर्ट मांय स्थायी न्यायाधीश बनायी ज्या है। वां सागे ई वकील कोटा ऊं बलजिंदर सिंह संधू, बिपिन गुप्ता, संजीत पुरोहित, रवि चिरानिया अर अनुरूप सिंघी ने अतिरिक्त न्यायाधीश रा तौर ऊं नियुक्त करी ज्या है। राजस्थान न्यायिक सेवा री आला अहलकार संगीता शर्मा ने ई अतिरिक्त न्यायाधीश बनायी ज्यी है।

000

अति पिछड़ा वर्ग अर गुर्जर समाज री न्यारी-न्यारी मांगां माथे विचार सारु मंत्रिमण्डलीय समिति री आज जयपुर मांय दूजी मीटिंग व्ही। इण मांय संसदीय कार्यमंत्री जोगाराम पटेल, मंत्री अविनाश गहलोत अर गृह राज्य मंत्री जवाहर सिंह बेढ़म सिरकत कीनी। मीटिंग मांय देवनारायण योजना री प्रगति, सरकारी भर्तियां मांय आरक्षण अर अन्दोलन रा असर वाळा पिरवारां ने अनुकम्पा नियुक्ति देवण समेत न्यारा-न्यारा मुद्दां माथे विचार करी ज्यो। समिति गृह विभाग ने गुर्जर आरक्षण आन्दोलन समिति ऊं जुड़्या मुकदमां रा बेगा निपटारा सारु जरूरी हुकम दीना। मीटिंग पाछे संसदीय कार्य मंत्री जोगाराम पटेल बतायो के गुर्जर आरक्षण संघर्ष समिति कानी ऊं दीरीजी मांगां माथे विचार क्यो जा रह्यो है।

000

नगरीय विकास अर आवासन मंत्री झाबर सिंह खर्वा सस्ता मकान बनावण री परियोजनावां अर नाळियां बनावण रा काम ने योजना सागे करण माथे जोर दीनी है। श्री खर्वा आज जयपुर मांय राजस्थान शहरी पेयजल सीवरेज अर अवसंरचना निगम लिमिटेड-रूडसिको रा बोर्ड री मीटिंग मांय बोल रह्या हा। वे कहे के जनता री जरूरत अर हिफाजत ध्यान राखता थकां योजना बनावणी चाहिजे। न्यारी-न्यारी योजनावां रा तैत कर्या रह्या कामां रो जायजो लेता थकां श्री खर्वा सस्ता मकान बनावण री परियोजनावां रा काम मंदा चालण परां चिन्ता जताता थकां अहलकारां ऊं असरदार कार्य योजना बनावण बाबत कहे।

000

मुख्य निर्वाचन अधिकारी नवीन महाजन वोटर लिस्टां रा विशेष गहन पुनरीक्षण कार्यक्रम रा बारा मांय आज जयपुर संभाग रा अहलकारां सागे मीटिंग कीनी। वे अभियान री तैयारी सारु जिला निर्वाचन अधिकारियां ने मोटा पैमाना माथे सिखावण देवण अर जरूरी कागजात भेळा करण रा हुकम दीना। श्री महाजन कहे के वोट देवण रा पात्र हर रेहवासी रो नाम वोटर लिस्ट मांय मांडणो ई अभियान रो मकसद है। मुख्य निर्वाचन अधिकारी सगळी सियासी पार्टियां सागे तालमेल कर र बूथ लेवल एजेन्ट्स री बेगी नियुक्ति बाबत ई कहे।

000

प्रोफेसर सुरेश कुमार अग्रवाल ने महर्षि दयानंद सरस्वती विश्वविद्यालय अजमेर रा कुलगुरु बनायी ज्या है। राज्यपाल अर कुलाधिपति हरिभाऊ बागडे ई बाबत हुकम जारी कर दीना है। कुलगुरु ओहदा माथे नियुक्ति प्रोफेसर अग्रवाल रे कामकाज संभाळबा री तारीख ऊं 3 साल या वां रे 70 साल रा व्हेवण ताई मांय ऊं जो भी पहले हो ताई मानी जावेला।

000

प्रधानमंत्री नरेन्द्र मोदी काल ब्रिटेन अर मालदीव रा दौरा सारु जावेला। विदेश सचिव विक्रम मिसरी आज नई दिल्ली मांय आ जाणकारी दीनी। वे बतायो के श्री मोदी ब्रिटेन रा प्रधानमंत्री कीर स्टारमर सागे मुलाकात करेला। वां रो किंग चार्ल्स तृतीय ऊं मुलाकात रो ई कार्यक्रम है। वे ब्रिटेन रा कारोबारियां सागे ई बातचीत करेला। विदेश सचिव बतायो के यात्रा रा दूजा दौर मांय श्री मोदी 25 जुलाई ने मालदीव पूगेला, जठे वे वठे रा राष्ट्रपति मोहम्मद मुइज्जु सागे मुलाकात करेला। वे 26 जुलाई ने मालदीव री आज़ादी री 60वीं वर्षगांठ रा जळसा मांय खास पावणा तौर ऊं सिरकत करेगा।

000

केन्द्रीय गृह अर सहकारिता मंत्री अमित शाह 24 जुलाई ने नई दिल्ली मांय राष्ट्रीय सहकारिता नीति-2025 रो ऐलाण करेगा। नुवी सहकारिता नीति रो मकसद सहकारिता हलका ने नुवो बणावण सागे सहकार से समृद्धि री सोच ने सांची करण सारु कार्य योजना पेश करणो है। ई नीति रे ज़रिए सहकारी संस्थावां रो प्रबंधन पेशेवर तरीका ऊं करण अर गांवाई हलकां री जनता सारु नौकरी-धंधा रा मौका बणावण री कोशिश करी जावेला।

000

केन्द्रीय श्रम अर रोजगार मंत्री डॉ. मनसुख मांडविया कह्यो है के नुवी प्रौद्योगिकी अर आर्टिफिशियल इंटेलिजेंस पाछे ई श्रमशक्ति अर कार्यबल हमेशा काम आवेला। वे आज नई दिल्ली मांय तीजा वैश्विक औद्योगिक संबंध सम्मेलन मांय बोल रह्या हा। डॉ. मांडविया कह्यो के कर्मचारियां रा भला सारु उद्योगां, संघां अर सरकार बीचे मदद रो खास काम है। श्रम मंत्री कह्यो के लारला दस साल मांय नौकरी-धंधा रा 17 करोड़ मौका बण्या अर कर्मचारी भविष्य निधि संगठन मांय करीब 16 करोड़ नुवा लोगां रा नाम मंडायी ज्या।

डॉ. मांडविया कह्यो के सरकार रो मकसद आवता पांच साल मांय पांच करोड़ नुवी नौकरियां पैदा करणो है।

000

मुख्यमंत्री भजनलाल शर्मा जनता ऊं **एक पेड़ माँ के नाम** अभियान रा तैत बत्ता ऊं बत्ता पौधा रोपण री अरज कीनी है। श्री शर्मा आज केकड़ी री कृषि उपज मण्डी मांय राख्यी ज्यी जनसभा मांय बोल रह्या हा। मुख्यमंत्री कह्यो के आब-ओ-हवा मांय बदलाव रो सामो करण सारु पौधा रोपणो ज़रूरी है। वे कह्यो के चौमासा मांय पौधा रोपण ऊं वां रे जीवता रेवहण री संभावना बध जावे है।

000

मुख्यमंत्री केकड़ी मांय विकास रा 1 हजार 250 करोड़ रुपया रा खर्च वाळा न्यारा-न्यारा कामां री नींव रखी अर पूरा व्ह्या काम जनता ने संप्या। श्री शर्मा वठे राख्यी ज्या खून दान शिविर रो दौरा कर र खून देवण वाळां सागे बातचीत कीनी। कार्यक्रम मांय विधानसभा अध्यक्ष वासुदेव देवनानी, उपमुख्यमंत्री डॉ. प्रेमचन्द बैरवा, मंत्री कन्हैया लाल चौधरी अर सुरेश सिंह रावत ई मौजूद रह्या।

000

सरोजनी दामोदरन फाउण्डेशन री ओर ऊं दी जावण वाळी छात्रवृत्ति योजना रो फायदो अब प्रदेश रा विद्यार्थियां ने ई मिल सकेला। फाउण्डेशन रा प्रधान सलाहकार पंकज त्रिपाठी आज जयपुर मांय खबरनवीसां सागे बातचीत करता थकां आ जाणकारी दीनी। वे बतायो के फाउण्डेशन री ओर ऊं देश रा 20 राज्यां अर केन्द्र रा राज वाळा प्रदेशां मांय होशियार पण माली तौर ऊं कमज़ोर विद्यार्थियां ने 15वीं कक्षा ताई री पढ़ाई करण सारु वजीफो दिया जावे है।

000

भरतपुर मांय लारला दिनां व्ह्या ज़ोरदार मेह पाछे शहर रा न्यारा-नयारा हलकां मांय पाणी भर ग्यो है। इण ने निकाळबा सारु भरतपुर विकास प्राधिकरण जनता री मदद बाबत क्यूआर कोड जारी कीनो है। म्हाणा खबरनवीस बतायो के क्यूआर कोड रे ज़रिए पाणी भरण ऊं जुड़ी जाणकारी आसानी ऊं अहलकारां ने दी जा सकेला।

ई बीचे लारला चौबीस घंटां मांय सिरोही, राजसमंद, पाली अर झालावाड़ मांय एक-एक सेंटीमीटर पाणी बरस्यो। मौसम विभाग आज अलवर, चित्तौड़गढ़, प्रतापगढ़ अर झालावाड़ ज़िलां मांय गरज सागे मेह व्हेवण रो येलो अलर्ट जारी कीनो है। राज्य मांय कठे-कठे हल्की ऊं मझला दर्जा री बरसात रो सिलसिलो 26 जुलाई ताई चालतो रेहवण रा आसार है।

000